



সংবিধান মেনেই জামায়াতকে নিষিদ্ধ করা যায় : ন্যাপ

সমকাল প্রতিবেদক

সংবিধান মেনেই জামায়াতের রাজনীতি নিষিদ্ধ করা যায়। মুজাহিদ একটা সুযোগের মধ্য দিয়ে আজকের অবস্থানে এসে দেশে কোনো যুদ্ধাপরাধী এবং স্বাধীনতাবিরোধী নেই বলে দাবি করছে। চোর কখনো স্বীকার করে না যে, সে চুরি করেছে। এখন তাদের সাফাই গাওয়ার কোনো সুযোগ নেই। ন্যাশনাল আওয়ামী পার্টির (ন্যাপ-মোজাফফর) সাধারণ সম্পাদক অ্যাডভোকেট এনামুল হক নির্বাচন কমিশনের সঙ্গে সংলাপে গতকাল রোববার এ কথা বলেন।

এদিকে আগামী ৩১ অক্টোবর জাতীয় সমাজতান্ত্রিক দল (ইনু) ও ১ নভেম্বর জাতীয় পার্টি (এরশাদ) নির্বাচন কমিশনের সঙ্গে বৈঠকে বসছে। এ দুটি দলের পূর্বনির্ধারিত তারিখ ছিল ২৯ সেপ্টেম্বর ও ৯ অক্টোবর।

এনামুল হক বলেন, জামায়াত যুদ্ধাপরাধী এবং স্বাধীনতাবিরোধী। এটা তাদের দলের আদর্শিক অবস্থান। যুদ্ধাপরাধের দায়ে তারা এ দেশে রাজনীতি করতে পারে না। সরকার সংবিধান মেনেই তাদের রাজনীতি নিষিদ্ধ করতে পারে এবং একইভাবে নির্বাচন কমিশন সে দলকে নিবন্ধন করবে না।

আলোচনা শুরু আগের প্রধান নির্বাচন কমিশনার (সিইসি) ড. এটিএম শামসুল হুদা বলেন, আইন সংস্কার নিয়ে দলগুলোর মধ্যে মতভেদ আছে। অনেক বিষয়ে দলগুলোর অবস্থান মুখোমুখি। তবে সব দলের মতামত নেওয়া শেষ হলে কমিশন তা খসড়া আকারে রাজনৈতিক দলগুলোর কাছে আবার পাঠাবে এবং চূড়ান্ত করার আগে এসব দলের সঙ্গে একদিন বসা হবে। তিনি বলেন, সব দলের কাছে গ্রহণযোগ্য হয় এমনভাবেই খসড়া তৈরি করা হবে।

ধর্মীয় অনুভূতি ও আন্তর্জাতিকভাবে স্বীকৃত বিভিন্ন প্রতীক নির্বাচনী কাজে ব্যবহার প্রসঙ্গে ন্যাপ জানায়, মিনার, উট, প্যাগোডা ধর্মীয় অনুভূতিকে ব্যবহার করা হয়। তাই কমিশনের উচিত হবে নির্বাচনের জন্য সংরক্ষিত দেড় শ' প্রতীক হতে এগুলো বাদ দেওয়া। আর দাড়িপাল্লা সারাবিশ্বে ন্যায়ে প্রতীক। তাই কোনো রাজনৈতিক দল যেন এটা ব্যবহার করতে না পারে সে ব্যবস্থাও কমিশন নিতে পারে।

নির্বাচন কমিশনের সঙ্গে বিভিন্ন সংস্কার বিষয়ে আলোচনায় ন্যাপের পক্ষে ১০ সদস্য উপস্থিত ছিলেন। আলোচনায় জাসদ পার্বত্য শান্তিচুক্তি অনুযায়ী চট্টগ্রামের স্থায়ী বাসিন্দাদের নিয়ে ভোটের তালিকা তৈরি, স্বচ্ছ ব্যালট বাক্স ব্যবহার, নির্বাচনী আইন ও বিধি লঙ্ঘন করা হলে নির্বাচন স্থগিতসহ বাতিল এবং লঙ্ঘনকারীকে শাস্তি প্রয়োগ করার ক্ষমতা প্রদান, ডিজিটাল পদ্ধতিতে ভোট প্রদানসহ বেশকিছু বিষয়ে প্রস্তাব রাখা হয়।

ছাত্র রাজনীতি প্রসঙ্গে ন্যাপ জানায়, দেশের ও গণতন্ত্রের স্বার্থে ছাত্র রাজনীতি প্রয়োজন। এছাড়া তারা আগামী নির্বাচনের আগেই নির্বাচন কমিশনের আর্থিকসহ সব বিষয়ে স্বাধীনতা প্রয়োজন বলে জানায়।

[Print](#)

Editor: Abed Khan

Published By: A.K. Azad, 136, Tejgaon Industrial Area, Dhaka - 1208,
Phone: 8802-9889821, 8802-988705, 9861457, 9861408, 8853926 Fax: 8802-8855981, 8853574,

E-mail: info@shamokalbd.com

If you feel any problem please contact us at: webinfo@shamokalbd.com

Powered By: NavanaSoft